

ESTILO *Salud Moda Beyesa*



Ronchi De Cuba y KOMA Models lo recuerda 30 aña di estilo cu fabuloso show

Tabata aña 1989, exactamente riba 8 di December, cu Ronchi De Cuba y un grupo di amiga a presenta e prome show grandi "Back to Life" na De Palm Island. Esaki sin sa cu e lo crea caminda pa un cantidad impresionante di desfilenan di moda di nos pais.

Asina Knock Out Organization a cuminsa. Hunto cu Roxanne Pietersz y Daphne Lejuez, a cuminsa presenta diferente desfilenan teatrico. Por corda entre otro "Vogue" y "Chaos" cu tambe tabata shownan grandi presenta pa e agencia di model.

Na 1991 nan a logra gana tur premio di moda durante "Prestige Awards" caminda cu Knock Out a sali agencia di aña, Dyanne Escalona modelo di aña y Ronchi De Cuba a gana coreografo di aña.

Asina e epoca nobo di moda y modelahe di e pais a cuminsa. Durante decada '90 a cuminsa e shownan di "Style" cual tabata e punto climactico di presentacionan teatrico di moda. Un show cu tabata worde presenta 2 of 3 anochi na Tropicana Showroom cu mas di 100 modelo y choreografianan actua espectacularmente.



Na 1997 Ronchi a dicidi di lanza International Female Model y International Male Model caminda cu modelonan di diferente parti di mundo tabata biaha pa Aruba pa asina competi y worde mira door di e mihor "model scouts" di mundo.

E era aki a continua te cu 2002 y tambe e desfilenan "Celebration of People" cu a marca e inicio di plus models na Aruba. Añanan 2006 pa 2012 tabata e era di Aruba Model Search. Un produccion di Ronchi De Cuba caminda nos isla a conoce su prome reality tv show basa ariba modelahe. Pa 6 temporada e show a goza di sintonia nacional.

Awor na 2019 e agencia KOMA Models y Ronchi De Cuba ta celebra 30 aña di esitio. Esaki lo ta na Ballroom di Hilton Aruba Resort dia 14 di September proximo. Tin entendi cu entrada pa cu e show ta sumamente limita pero si lo livestream e show riba rednan social.

